

F A B L A C H E S A

POR VEREMUNDO MENDEZ COARASA

Lo sol de los lobos

*Cuando lo sol s'en ve indo
y ve baxando'nta tierra, y
dezaga d'ella s'esconde,
allora, no'n guipas beta.
Poquet a poquet, la luz,
veyes, cada vez, que mengua
y que se ve emborroniando,
lo que ye lejos u cerca,
con lumbre, que, poco u muito,
ve tirando, siempre, a negra.
De repente, la luz, cambia
y todo l'ambito emplena,
de color royo, de fuego,
como si bella foguera,
tan grán como bel món nuestro,
ardese, cremando tieda.
Allora i-veyes las puntas
y las nubes que ban mas cerca,
royas, de color de sangre.
Lo sol de los lobos plega,
emplindo toda la val*

y poquet a poquet, mengua,
cuando ya se'n ye íu, de raso,
zarrando la nuey amuestra,
una estrela reluciente,
que por los cielos navega...
Ye la siñal y en los cados,
escondius en móns y en selvas,
u en espelungas, que i-n-bá,
que hombre que bayan dentráu en ellas
onsos, lobos y rabosos,
fuinas, gatas montesas,
taxóns, xabalíns y loiras
y otros muitos mas, s'espiertan,
s'estiran, tántian las uñas,
los caxals, u lo que emplean,
cada cual, cuando ve'n busca,
d'atrapar caza indefensa,
por lo goyo de matar,
u por minchar lo que puedan,
que pa vivir lis fa falta,
según ye ley en la selva,
marchando a seguir los rastros,
dimpués que los cados dexan,
los que cada cual prexina,
haber pronto y fácil presa.
Por contra, cuando lo sol
de los lobos, todo emplena,
de lumbré roya, de sangre,
por los móns y por las selvas,
los coniellos y las llebres,
perdices y otras montesas
y las que son de corral
pirinas, poniendo, u clecas
u otros que duermen al raso,
crabas, mardanos u ovelas,
yeguas, potros u lecbals

y abrios con las betiellas
u betiellos, cuando veyen
lo sol ixé, todos temblan;
las cerrras meten de punta,
si'n d'esterizos, no'n queda;
renchilan, belan y gramán,
de contino u esberrecan,
que han sentiu botilar lobos
y d'ellos puén estar presa
y como lis ve la vida,
demandan, así defensa.
Solo, al caso, bel mastín.
dexa de mirar ta tierra;
segudindo la carlanca,
devantando la cabeza,
gruñe, y se mete de cara,
enta do l'aire li amuestra,
que ha veniu lo botilar,
de ixé lobo a qui él espera
fer a polvos, si lo pilla,
cuando a por ovellas vienga,
que ye lo can de los fierros
y lo miedo, pa él, no cuenta.
Cuando ye le nuey zarrada,
d'aquellas, de raso, negras,
u con creciente u menguante,
que cuasi no alumbran beta,
ixa ye la señalada,
aparente pa las fieras
y como quiera se siga,
caza farán, mala u güena,
aunque no zarren los güellos,
mastíns y pastós que veilan...
Lo sol de los lobos sale,
cuando no bi-há luna plena
y esto a los mocez lis dicen,

cuando, p'adormirlos, cuentan,
rodiando los fogarils,
en las nueys madris u güelas
pa que tornen ta las casas,
todas las tardis que i-vean,
salir lo sol de los lobos,
en los móns de la val nuestra,
que allora salen, con fambre,
de los cados ixas fieras,
y se levan a los críos,
cuando no troban ovellas.